

Parlimen: Usul Penguntukan Semula Peruntukan Perbelanjaan Penyusunan Semula Tiga Kementerian Dibentang Bernama 15 Julai, 2013

KUALA LUMPUR, 15 Julai (Bernama) -- Timbalan Menteri Kewangan Datuk Ahmad Maslan hari ini membentangkan usul penguntukan semula peruntukan perbelanjaan pengurusan dan pembangunan berikutan penyusunan semula tiga kementerian di Dewan Rakyat.

Usul itu dikemukakan di hadapan Timbalan Yang Dipertua Dewan Rakyat Datuk Ronald Kiandee.

Usul itu dibentangkan berikutan penyusunan semula tiga kementerian yang berkuatkuasa 16 Mei lepas memabitkan fungsi dan agensi-agensi di bawah Kementerian Pengajian Tinggi digabungkan dengan Kementerian Pelajaran yang kini dikenali sebagai Kementerian Pendidikan.

Selain itu, fungsi dan agensi berkaitan kebudayaan di bawah Kementerian Penerangan, Komunikasi dan Kebudayaan yang kini dikenali sebagai Kementerian Komunikasi dan Multimedia dipindahkan ke Kementerian Pelancongan yang kini dikenali sebagai Kementerian Pelancongan dan Kebudayaan.

Usul itu juga bagi fungsi dan agensi kesejahteraan bandar di bawah Kementerian Wilayah Persekutuan dan Kesejahteraan Bandar yang kini dikenali sebagai Kementerian Wilayah Persekutuan dipindahkan ke Kementerian Perumahan dan Kerajaan Tempatan yang kini dikenali sebagai Kementerian Kesejahteraan Bandar, Perumahan dan Kerajaan Tempatan.

Ahmad berkata perbelanjaan pengurusan bagi maksud yang melibatkan kementerian yang disusun semula itu telah diperuntukkan melalui Akta Perbekalan 2013.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=963286>